

Mga taktika sa nagkakaisang prente laban sa rehimeng US-Estrada

Memorandum para sa lahat ng yunit ng Partido
Mula sa Komiteng Tagapagpaganap ng Komite Sentral
Partido Komunista ng Pilipinas

KABULUHAN NG PRENTENG ANTI-ESTRADA

Ang pagsiklab ng krisis at mga protesta ay nagluwal ng isang prenteng anti-Estrada na ang lawak at militansya ay paminsan-minsan lamang makita sa kasaysayan. Nakahanay dito ang mga manggagawa, magsasaka, petiburgesyang lunsod, panggitnang burgesya at ang anti-Estradang seksyon ng mga reaksyunaryong uri. Ang di-karaniwang lapad nito ay partikular na makikita sa lawak ng mga seksyon ng negosyo, mga simbahan, akademya at *mass media* na lantad na nananawagan sa pagbibitiw ni Estrada.

Ang batayan ng pagkakaisa ng prenteng ito ay ang kagyat na pagpapatalsik kay Estrada sa pamamagitan ng pagbibitiw, pag-*impeach* o di kaya'y iba pang paraan. Nagawa na nitong malubhang ihiwalay ang rehimeng Estrada. Tuluy-tuloy pa ang mga paglalantad sa pamamagitan ng mga protesta sa lansangan, *mass media*, kongreso, *internet*, *text*

messages, atbp. Sigeng pinalalakas ang presyur para pwersahin si Estrada na umalis na agad sa poder.

Ang namumukod na kabuluhang pulitikal ng prenteng ito ay nasa:

- Pagpukaw at pagpapakilos sa malaking bilang ng masa sa pinakamabilis na paraan; at
- Puspusing paghihiwalay at pagpapatama ng pinakamatinding dagok sa kinamumuhang naghaharing rehimen.

Dahil sa mga ito, kinakailangang iakma ang pakikitungo sa ibang pwersang lumalaban sa rehimen. Ang pagpukaw sa milyun-milyong mamamayan at ang pagpapaigting ng mga protesta't pakikibaka para pabagsakin ang naghaharing rehimen ay binibigyan ng higit na timbang kaysa iba pang kunsiderasyon. Halimbawa, kahit mahigpit ang pakikibaka sa dilawang unyonismo sa kilusang paggawa,

wastong makipagtulungan sa mga dilawang unyong anti-Estrada para sa mga pangkalahatang welga at malakihang aksyong protesta na humihingi ng pagbibitiw ni Estrada.

Sa punto de bista ng rebolusyonaryong kilusan, nagiging mas makabuluhan ang prenteng anti-Estrada habang mas umiigting ang mga bigwas sa naghaharing rehimen at habang mas lumalawak ang masa ng sambayanang napapalahok sa paglaban.

Sa punto de bista ng rebolusyonaryong kilusan, nagiging mas makabuluhan ang prenteng anti-Estrada habang mas umiigting ang mga bigwas sa naghaharing rehimen at habang mas lumalawak ang masa ng sambayanang napapalahok sa paglaban. Habang nagiging mas militante, mas palaban at mas malawakan ang pagkilos ng mamamayan, lalong lumalaki ang aktwal at potensyal na pakinabang sa pag-unlad ng kamalayan at praktika ng masa, pagpapahina sa mga sagadsaring reaksyunaryo, pagtataguyod ng mga makabuluhang reporma at pagsusulong ng rebolusyon.

Impormal ang kabuuang prente. Ang ugnayan at koordinasyon ay umiinog sa pagsasagawa ng pinagsanib na mga aksyon. Ang igting ng labanan mismo ang nagtutulak sa mga pwersang anti-Estrada na magtulungan at masugid na magpalaki at magpatindi ng mga protestang masa. Sa kabilang banda, dahil impormal ang prente, namamayani ang kani-kanyang inisyatiba pagdating sa pagsusuri sa mga isyu, pagbubuo ng mga panawagan, mobilisasyon ng pwersa, pag-ugnay sa malawak na masa, pagbubuo ng mga organisasyon at pakikipag-ugnayang multilateral at bilateral.

Alinsunod sa impormal na katangian ng prente, walang komon na programang pampulitika, walang pirming istruktura ng pamumuno at koordinasyon. Bentahe nito: nakatuon ang pansin at ugnayan sa kagyat na pagpapaigting ng mga protesta at pakikibaka. Maksimum ang fleksibilidad sa pagtangan ng mga di pagkakasundo at naiiwasang mabalaho sa mga banggaan sa ideolohiya at teritoryo—alang-alang sa pagpapaigting ng pakikibaka.

ISLOGAN SA PAGPAPATALSİK KAY ESTRADA

Ang pangkalahatang panawagan ng Partido sa kasalukuyang sitwasyon ay “Pabagsakin ang reaksyunaryong rehimeng US-Estrada, Palawakin at paigtingin ang rebolusyon!”

Nililinaaw dito ang prinsipal na tungkuling pabagsakin ang naghaharing rehimen at ang pangangailangang gawin ito sa paraang naglalapit ng rebolusyon sa tagumpay. Alinsunod sa aktwal na antas ng pagsulong ng rebolusyon, kabuuang balanse ng mga pwersa at antas ng kamalayan at praktika ng mamamayan—hindi pa kabuuang tagumpay kundi malaking pagsulong ng rebolusyon ang layunin.

Kinikilala rin ng pangkalahatang panawagan ang pangunahin at sekundaryong mga larangan ng pakikibaka para pabagsakin si Estrada. Pangunahin ang mga protesta sa lansangan, ibig sabihin, ang ligal na larangan at pakikibaka. Sekundaryo ang armado at ilegal na pakikibaka.

Ang islogan sa pagpapatalsik/*impeach/resign* ay mga ligal na islogan para sa pagpapabagsak sa rehimeng US-Estrada.

Ang pangkalahatang diin ng mga ligal na panawagang ito ay ang pagpapalawak at pagpapaigting ng mga protestang masa at iba pang ligal na pakikibaka para mapaalís sa kapangyarihan ang rehimeng Estrada. Ang pinakamataas na antas na pwedeng abutin nito ay ang malawakang *civil disobedience*, kabilang ang pagkubkob ng mamamayan sa Malakanyang para pwersahin si Estrada na magbitiw.

Syempre pa, kapag hindi nalutas ang krisis sa ligal na paraan, titingkad ang usapin ng mga di-konstitusyunal na pamamaraan (asasinasyon, kudeta, armadong rebolusyon) ng pagpapabagsak sa kinamumuhianing rehimen. Ngayon pa lamang lumalakas na ang mga usap-usapan sa pagkilos ng mga upisyal at pwersang militar at pulisya para suportahan ang panawagang magbitiw si Estrada.

Para maisulong ang ligal na pakikibaka sa reaksyunaryong rehimeng US-Estrada sa paraang nagtataguyod sa linya ng demokratikong rebolusyong bayan, kailangang:

□ Malawakang pakilusin ang mamamayan sa mga protesta at iba pang pakikibakang masa;

□ Ipalaganap ang propagandang pambansa-demokratiko kasabay at kaugnay ng ahitasyon laban sa rehimeng Estrada. Isulong ang pakikibakang anti-Estrada bilang isang pakikibakang anti-imperyalista, antipyudal at antipasista;

□ Masigasig na palawakin at palakasin ang mga organisasyong pambansa-demokratiko;

□ Mapangahas na palawakin ang Partido at rebolusyonaryong kilusang lihim para pag-ugnayin ang mga pwersa at pakikibakang ligal at iligal at palakasin ang iba't ibang tipo ng suporta para sa armadong pakikibaka sa kanayunan.

TAKTIKAL NA ALYANSA SA MGA REAKSYUNARYONG ANTI-ESTRADA

Saligang usapin sa taktika ng rebolusyon ang wastong pakikitungo sa mga tunggalan at alitan ng mga reaksyunaryo. Malubhang pagkakamali para sa isang rebolusyonaryo na magwalang-bahala sa usaping ito. Dapat aktibong samantalain at lalong patindihin ang mga pagkakahati-hati at alitan ng mga reaksyunaryo para pabilisin ang pagpapahina ng reaksyon at pagpapalakas ng rebolusyon.

Kinakailangan ngayon ang mas malawak at mas agresibong taktikal na pakikipag-alyansa dahil napakaigting ng pagkakahati-hati at alitan ng mga reaksyunaryo. Ang mga alitang ito ay mga alitang paksyunal na kunektado sa krisis ng sistemang malapyudal: Patuloy na lumiliit ang pakinabang na mapaghahati-hatian ng mga reaksyunaryong paksyon at pukpukan ang kanilang labanan sa kung sino ang matitirang matibay. Ibayong pinasahol pa ang mga alitan ng labis na kasakiman, lansakang pang-aabuso sa kapangyarihan, pandarambong, kabulukan, kroni-ismo, militarismo at mali-maling palakad ng naghaharing pangkating Estrada.

Wasto bang pakitirin sa naghaharing pangkating Estrada ang target ng pakikibaka ngayon? Wasto at kinakailangan, salungat sa ipinangangalandakan ng ilang nagpapanggap na kaliwa na mas rebolusyonaryo raw ang sabay-sabay na umatake sa maraming kalaban. Saligang patakaran sa nagkakaisang prente ang pagkabig sa marami, paglaban sa kaunti at paggapi sa

kaaway nang paisa-isa.

Ang patakarang ito ay nakasalalay sa wastong pag-iiba-iba sa mga kaibigan gayundin sa mga kaaway. Dapat pag-ibahin ang mga kaibigang matagalan at maaasahan at mga kaibigang pansamantala at di maaasahan. Dapat pag-ibahin ang mga kaaway na malaki, panggitna at maliit, nasa kapangyarihan at wala, kaaway ngayon at kaaway bukas.

Ang pagpapakitid sa target ng pakikibaka ay hindi nangangahulugang ititigil ang pakikitunggali sa sekundaryong kaaway at kaaway bukas. Ang taktikal na alyansa ay hindi nangangahulugang tigil na ang pakikitunggali sa mga alyadong di maaasahan, panandalian at reaksyunaryo. Tuluy-tuloy ang pakikitunggali sa kanila para pangalagaan ang integridad sa ideolohiya at organisasyon ng Partido at rebolusyonaryong kilusan. Kailangan din ito para mapalawak at mapaunlad ang ating ugnayan at pamumuno sa masa. Gayunman, ang pakikitunggali ay may pagtitimpi at nagsasaalang-alang sa pangangailangan ng pagkakaisa at tulung-tulong na pakikibaka sa komon na kaaway.

Habang isinusulong ang mga konsultasyon at koordinasyong bilateral at multilateral sa taktikal na alyansa, pinalalakas ang inisyatiba ng mga rebolusyonaryong pwersa. Sa gayon, iniwasang maging buntot lamang ng mga alyadong reaksyunaryo, tinitiyak na kaya nating magpursigi sa pakikibaka kahit magdalawang-isip o magtaksil sila at tuluy-tuloy na napalalakas ang mga rebolusyonaryong pwersa.

Sa kanilang isilogang “Resign All”, nais ng mga impostor na kaliwa na palaparin, sa halip na pakitirin, ang target ng pakikibakang bayan at itulak ang pagbubuo ng ikatlo’t “kaliwang” prente daw na ibinabangga sa malawak na prenteng anti-Estrada. Ang mga ito ay nagsisilbi sa mga taktikang

Ang pagpapakitid sa target ng pakikibaka ay hindi nangangahulugang ititigil ang pakikitunggali sa sekundaryong kaaway at kaaway bukas. Ang taktikal na alyansa ay hindi nangangahulugang tigil na ang pakikitunggali sa mga alyadong di maaasahan, panandalian at reaksyunaryo.

mapanghati ni Estrada at nagpapapurol ng atake ng mamamayan laban sa reaksyunaryong naghaharing rehimen. Tinatangka nilang lituhin ang mga pwersang rebolusyonaryo at progresibo sa pamamagitan ng paghahalu-halo ng mga usapin sa ideolohiya at pulitika, dogmatistang pagsasapaw ng mga usaping pundamental at matagalan sa mga kalagayan at usaping taktikal, bukod sa pagpapakalat ng mga intriga at lansakang pambabaluktot.

Panggugulo at paninira sa Partido at rebolusyonaryong kilusan ang patuloy na

nangingibabaw na gawain ng mga kontra-rebolusyonaryong taksil. Kailangang patuloy silang ilantad, ihiwalay at lansagin.

May mga pagkakataong kahit labag sa kagustuhan natin, ang mga impostor ay nakakasingit sa mga alyansa o mga pinagsanib na aktibidad sa pamamagitan ng pagsabit sa mga alyado. Ang pagsingit nila ay hindi natin hahayaang makahadlang sa pakikipag-alyansa at pagpapaigting ng mga protesta basta't tinitiyak na menor ang kanilang lugar at tinitiyak na hindi sila makapupwesto para lamang makapanira at makapaminsala sa atin

USAPIN NG IPAPALIT KAY ESTRADA

Bilang kapalit ng kinamumuhiang naghaharing rehimen, ang mga pwersang pambansa-demokratiko ay nagtataguyod ng pagbubuo ng pambansang konseho ng pagkakaisa at pagbabago na may karampatang kinatawan ang mga manggagawa, magsasaka at iba pang demokratikong uri at sektor

bukod sa iba pang pwersang anti-Estrada at nagsusulong ng programang anti-imperyalista, antipyudal at antipasista. Di hamak na mas mainam ito kaysa sa “united opposition” na binubuo ng mga reaksyunaryong partidong pampulitika lamang. Kahit hindi ito mabuo, malilina sa masa ang sariling tindig at programa ng kilusang pambansa-demokratiko.

Hangga't ligal ang pangunahing larangan at paraan ng pagpapabagsak sa rehimeng Estrada, si Macapagal-Arroyo at ang “united opposition” ang nangunguna sa hanay ng papalit sa kapangyarihan. Ang kanyang pagbibitiw sa gabinete ng Estrada ay mahalagang pihit sa paghihiwalay sa rehimeng Estrada at pagpapaigting ng pakikibakang anti-Estrada. Walang dudang si Macapagal-Arroyo ay kinatawan ng mga lokal na uring reaksyunaryo at ang kanyang rekord sa pulitika ay bilang nangungunang tagapagtaguyod ng mga patakarang pro-imperyalista, anti-mamamayan at anti-demokratiko. Pero dahil humanay sa prenteng anti-Estrada at naghahabol na kunin ang suporta ng kilusang protesta, obligado siyang magposturang bukas sa mga progresibong pwersa at mangako ng mga makabuluhang reporma.

Sa balangkas ng impormal na taktikal na alyansa para sa pagpapabagsak ng reaksyunaryong rehimeng Estrada, hindi obligado ang mga pwersang pambansa-demokratiko, kahit ang mga ligal na pwersang pambansa-demokratiko, na pormal na iendorso ang pagpalit ni Macapagal-Arroyo kay Estrada. Sa katunayan, karapatan at tungkulin ng mga pwersang pambansa-demokratiko na linawin sa masa ang reaksyunaryong katayuan at rekord sa pulitika ni Macapagal-Arroyo at ang pangangailangan ng patuloy na militansya at pakikibaka pagkatapos maibagsak si Estrada. Kaalinsabay, hindi rin kailangan at hindi tumpak na iangat ang paglalandad sa reaksyunaryong katangian ni Macapagal-Arroyo sa antas ng pagsalungat at paglaban sa kanyang pagpalit kay Estrada—para hindi mapapurol ang paghihiwalay at paglaban sa naghaharing pangkating Estrada.

Sa kasalukuyan, habang hindi iniendorso ni sinasalungat ang pagpalit ni Macapagal-Arroyo,

Bilang kapalit ng kinamumuhiang naghaharing rehimen, ang mga pwersang pambansa-demokratiko ay nagtataguyod ng pagbubuo ng pambansang konseho ng pagkakaisa at pagbabago na may karampatang kinatawan ang mga manggagawa, magsasaka at iba pang demokratikong uri at sektor bukod sa iba pang pwersang anti-Estrada at nagsusulong ng programang anti-imperyalista, antipyudal at antipasista.

ang mga ligal na pwersang pambansa-demokratiko ay nagsasagawa ng publikong pakikipagpalitang-kuro para ihapag ang mga patakaran at programang dapat itaguyod ng isang pamahalaang Macapagal-Arroyo. Sa gayon, malinaw na idinideklara ang paninindigan ng mga pwersang pambansa-demokratiko at ang patuloy na pakikipaglaban para rito. Kaalinsabay, hindi binibitiwan ang pakikibaka para sa mga reporma, ang pagsusulong ng mga pakikibakang ligal at parlamentarista at pagkilos sa loob ng mga reaksyunaryong institusyon sa layuning gumawa ng mga pampulitikang paglalantad at makipaglaban para sa mga makabuluhang pakinabang at konsesyon sa kapakanan ng sambayanan.

BANTA NG KUDETA

Manipestasyon ng higit pang paglalim ng krisis sa pulitika ang mga panawagan ng mga retiradong heneral sa pagtalikod ng AFP-PNP sa kinamumuhang naghaharing rehimen, ang paglutang ng mga usap-usapan sa kudeta, gayundin ang tumitinding paggamit ng paniniktik, panggigipit, karahasan at banta ng karahasan sa mga pwersang anti-Estrada, kabilang ang mga karibal ni Estrada sa pulitika. Pinakatampok sa huli ang pagdukot kay Dacer.

Dapat mahigpit na kundenahin at labanan ang anumang panghihimasok o paggamit ng kontra-rebolusyonaryong AFP-PNP para supilin ang mga demokratikong pwersang lumalaban sa kinamumuhang naghaharing rehimen.

Kaalinsabay, iwasan ang posturang burges na pasipista at konstitusyonalista sa usapin ng pagsangkot ng mga upisyal at tauhang militar sa pakikibakang anti-Estrada. Dapat engganyuhin ang mga makabayan at demokratikong upisyal at tauhang militar na manindigan at pumanig sa pakikibaka ng bayan laban sa naghaharing rehimen.

ANG KRISIS AT ARMADONG PAKIKIBAKA

Ang mga rebolusyonaryong pwersang armado at ilegal ay kabilang sa prenteng anti-Estrada. Pero ang kabuuang pokus ng paglaban para pabagsakin si Estrada ay nasa mga protestang masa sa lansangan. At mangyari pa, di tuwiran ang ugnayan,

koordinasyon at pakikipagtulungan ng mga rebolusyonaryong pwersang armado at ilegal sa mga pwersa, alyansa at pakikibakang ligal.

Ang mga taktikal na opensiba ay kabilang sa mga pinakamatinding bigwas na maaaring patamain sa reaksyunaryong naghaharing rehimen at, sa gayon, kailangang palawakin at palakasin para mapabilis ang pagpapahina at pagpapabagsak dito.

Ang matitinding pagkatalo sa labanan ay tiyak na magpapabilis sa pagbasag sa pagsuporta ng kontra-rebolusyonaryong militar at pulisya kay Estrada. Kailangan din ang hukbong bayan para parusahan at papanagutin sa katarungan ang pinakamasahol at pinakamalaking mga kriminal at kaaway ng bayan.

Sa pamamagitan ng armadong pakikibaka (pagbubuo ng hukbo, rebolusyong agraryo at pagbubuo ng base) makakamit ang pinakasolidong mga pakinabang ng sambayanan at rebolusyon sa pakikibaka sa kinamumuhang naghaharing rehimen ng US-Estrada. Kaya ang pagsusulong ng armadong pakikibaka ay krusyal sa pag-iipon ng lakas ng mga rebolusyonaryo at progresibong pwersa para sa matagalang laban.

Sa halip na makapagligtas dito, ang mga desperadong pakana ng naghaharing rehimen ay lalo lamang nagpapalalim ng hukay na kinalalagyan nito. Lalong sinasaid ang kabang-yaman ng bangkrap na gubyerno, lalong pinaninipis ang latag ng banat na banat nang mga pwersa ng AFP-PNP at lalong pinag-aalab ang galit at paglaban ng sambayanan. Lalong kailangang higpitan ang hawak sa baril at mapangahas na isulong ang digmang bayan. **AB**

Ang mga taktikal na opensiba ay kabilang sa mga pinakamatinding bigwas na maaaring patamain sa reaksyunaryong naghaharing rehimen at, sa gayon, kailangang palawakin at palakasin para mapabilis ang pagpapahina at pagpapabagsak dito.

